



Auto / Motor

U Švicarskoj postoji dobro izgrađena putna mreža. Upotreba većine puteva je besplatna. Saobraćajna pravila su veoma važna. Kazne za prekršaje u saobraćaju su visoke.

Saobraćajna pravila

Pravila u saobraćaju su od velikog značaja za vozače automobila u Švicarskoj. Kazne su u poređenju sa drugim zemljama veoma visoke. U slučajevima teškog kršenja pravila može doći do oduzimanja vozačke dozvole. Neka važna pravila:

- Maksimalna brzina u naseljenim sredinama: 50 km/h, izvan naselja: 80 km/h i autoput: 120 km/h
- Na autoputu je zabranjeno preticati sa desne strane
- Svjetlo mora biti upaljeno i po danu
- Sve osobe u automobilu moraju imati vezane pojaseve
- Djeca moraju za vrijeme vožnje da sjede u sjedištima za djecu (do 12 godina starosti ili do visine od 150 centimetara)
- Telefoniranje tokom vožnje je dozvoljeno samo uz upotrebu mikrofona i zvučnika
- Vožnja pod dejstvom alkohola i droge je kažnjiva (granica 0.5 promila alkohola)
- Pješaci na pješačkom prelazu uvijek imaju prednost (osim ako je prelaz ulice regulisan semaforom)

Putarina

Puteve finansiraju Savez, kantoni i opštine. Upotreba puteva je besplatna. Izuzetak su autoputevi: Vozači koji žele koristiti autoputeve moraju kupiti svake godine naljepnicu za putarinu (Vignette). Ona se lijepi na prednje staklo. Naljepnice za autoput se mogu kupiti na benzinskim pumpama, u pošti ili u službama za saobraćaj.

Osiguranje

U Švicarskoj se smiju voziti samo ona motorna vozila koja su osigurana. Razna osiguravajuća društva nude osiguranje od odgovornosti za motorna vozila (Motorfahrzeug-Haftpflichtversicherung | assurance automobile). Osiguranje plaća nadoknadu štete koja se izazove motornim vozilom (materijalnu i ljudsku). Za oštećenja sopstvenog automobila može se zaključiti dodatno osiguranje (Kaskoversicherung | Assurance casco). Upozorenje: Ukoliko se neko ponaša krajnje nepažljivo, moguće je da osiguranje ne plati štetu (na primjer, u slučaju vožnje pod uticajem alkohola ili droge). Osiguranje od odgovornosti za motorna vozila nije sadržano u osiguranju od privatne odgovornosti.



Kanton Bern
Canton de Berne

hallo-bern.ch
salut-berne.ch

Uvoz motornog vozila

Ukoliko neko želi uvesti motorno vozilo u Švicarsku, to vozilo se mora prijaviti na carini i ocariniti. Vozilo mora biti tehnički ispravno. Pri tom je potrebno posjedovati: osiguranje od lične odgovornosti za motorna vozila, švicarsku vozačku dozvolu i švicarske tablice za auto. Detaljnije informacije pruža Služba za drumski saobraćaj Kanton Bern (Strassenverkehrsamt | Office de la circulation routière).

Više informacija (linkovi, adrese, brošure, informacioni listovi)

www.hallo-bern.ch/hr/mobilnost/auto--motor

hallo-bern.ch

Informacije za dobar početak u novom mjestu stanovanja

Mobilnost / Auto / Motor